

钦定剿平捻匪方略



欽定剿平捻匪方略卷二百十九 甲子年

八月初四日

壬申

官文奏言七月十八日成大吉

因徐門古北岡尙須布置商令周鳳山移營駐紮該逆盡起山內馬步賊二萬餘並白杲賊衆由東山疾趨而下成大吉立派總兵曾昭仕等軍馳往接應分列三路屹立不動先令馬隊誘戰步隊開礮轟擊連斃賊目數十名成大吉督

隊乘勢衝殺該逆敗下山岡而道觀河賊股拌  
命回衝成大吉令礮隊面面開放該逆拌死衝  
突我軍槍礮齊施鏖戰兩時該逆紛紛敗退成  
大吉等商定於十九日三面進攻白杲及夫子  
河沙河密耳山三路髮捻楊朝林由六合集尹  
唐岡進周鳳山由夫子河橫攻而進富森保等  
由大崎山之東沿山搜伏而進成大吉自率馬

隊先由南岡馳出雲霧砦等處該逆蟻聚蠡屯  
依山憑壘成大吉飭曾昭仕等率隊向南橫截  
時夫子河沙河之賊見我軍逼近山腳合股來  
鬪我軍以劈山礮連環轟擊各軍勇氣百倍力  
擣中堅賊勢不支越嶺逃竄亦有退伏壘中者  
我軍直逼壘前礮石如雨成大吉奮臂大呼各  
營踴躍爭先冒險前進立將沙河賊壘十餘座



賊卡數十處並胡家松林一帶賊壘賊卡一律  
踏毀富森保等亦將徐門古一帶賊壘攻破楊  
朝林由六合集直抵白杲賊壘奮力猛撲周鳳  
山移隊進攻沙河坳等處前後夾擊賊不能敵  
遂將沙河坳一帶賊壘賊館二十餘處悉數平  
毀該逆奔逃無路遂伏匿於銀家官塘三角灣  
壘內踞險死守姜玉順等於十九日派隊由沙

子岡銀河集攻勦密耳山賊匪該逆竭力抵拒  
因成大吉等營獲勝後路煙燄四起賊之後隊  
遂向鵝籠司安家寨等處北走前隊竄回老巢  
姜玉順等收隊後偵知大股捻匪折竄西北遂  
密會各營過河潛至中館驛賊聚之處齊聲吶  
喊頗有斬擒連日陷陣衝鋒斬悍擒百餘名賊  
遂敗退又髮擒馬融和張總愚由羅田折竄蘄

水縣屬之關口蔡家河一帶梁洪勝督率陳興  
愷等分路抄入賊館擒斬多名該逆潰走我軍  
跟追數里而還據各營先後呈報前來臣查髮  
捻大股自團陂回竄後經此次痛勦勢必奪路  
狂奔僧格林沁駐兵光息之交該逆未能竄越  
惟楚省後路未免空虛賊之後隊已潛向鵝籠  
司安家集西走黃安縣屬之料棚查河口距料



棚不遠爲黃安黃陂羅山三縣交界要隘當經  
檄調總兵李成謀一軍由新洲馳赴河口令趙  
克彰三營移紮孝感之小河溪飛檄姜玉順等  
軍會合楊朝林先扼黃孝要路卽由中館驛進  
兵力攻麻城西南股匪成大吉等攻麻城之東  
南賊壘周鳳山卽在徐門古一帶防守爲後路  
援應惟賊蹤徧布以深山爲巢穴一經擊敗難



保不由山僻小路潛出豫省更恐首尾分路猛  
奔則上下游同時喫緊惟有嚴飭各軍審察賊  
情隨地隨時相機勦辦不敢以逆勢漸衰稍涉  
大意

官文又奏言各軍自七月十九日戰捷後於二  
十一日分投猛撲先後將銀家官塘三角灣密  
耳山等處賊壘悉數平毀白杲之賊被北路各

軍追擊向東山內紛紛四竄卽將白杲當時攻  
克因山路崎嶇馬步均難躡剿白杲山內東竄  
之賊遂由大坳小坳竄向蘄水縣屬之蔡家河  
巴水驛一帶其被擊西竄者糾合料棚匪黨分  
竄淨瓶山及光山縣屬之新集趨向靡定俟探  
明戰狀及敗賊確蹤卽當相機布置分兵兜剿  
同日張之萬毛昶熙奏言麻城之賊竄伏閩家



河東南山內意在恃險抗拒蘇克金張曜英翰等商議奪險入山卽可直擣白杲正籌畫閒七月十一日賊衆二萬餘人突由白杲竄至闔家河蘇克金張曜督率馬步進剿各隊奮勇齊進立斬悍賊無算壓至山根敗匪悉奔上山沿途殺斃長髮老賊五六百名生擒百餘名是日英翰一軍遇賊接仗亦斬馘無算先是張曜訊據

獲賊供稱該匪有向東北逃竄之說僧格林沁  
以麻邑東北卽係豫境商城地面派張曜徐連  
陞所部卽往商城駐紮臣等惟有嚴飭前敵各  
將領懍遵僧格林沁調度互相策應惟頃接官  
文來咨賊蹤圖竄上游臣等查麻邑之西黃安  
孝感皆賊熟徑一折而西卽是豫之信陽羅山  
不可不先爲之備現已由臣張之萬飛調荆子

關防兵千名飭遊擊張士元帶赴信羅扼要駐紮以防竄越刻下賊蹤或東或西尙無定向萬一連蹤西竄於楚秦豫之交則豫之南陽邊界又形喫重臣張之萬必當就現有兵力督率馳援以顧本省如竄別處亦當飭令前敵諸將跟蹤追擊不得稍分畛域均奏入

上命議政王軍機大臣傳諭僧格林沁官文曾國藩



喬松年張之萬毛昶熙劉蓉李雲麟曰七月十九  
等日成大吉等進攻白杲及夫子河等處髮捻將  
沙河等處賊壘踏平多座該逆奔逃姜玉順等進  
剿密耳山大股賊匪亦獲大捷賊向鵝籠司安家  
寨等處北走其中館驛聚賊亦經擊敗髮捻各竄  
蘄水縣屬之關口蔡家河一帶梁洪勝等抄入頗  
有斬擒二十一日各軍將銀家官塘等處賊壘悉

數毀平並克白杲老巢餘匪東西分竄蔡家河及  
淨瓶山等處著僧格林沁督飭馬步各軍將麻城  
賊匪認真勦洗其竄光山新集之賊僧格林沁確  
探賊蹤派兵迎擊張之萬責任封圻亦不得坐視  
逆匪闖入並著於光羅等境嚴密防勦賊蹤飄忽  
靡常恐不得志於楚豫將犯皖疆曾國藩喬松年  
當督飭派出前敵各軍遇賊卽擊如防勦不力查

由何路入境卽將派防之帶兵官嚴行叅處或仍  
圖由舊路回陝卽著劉蓉李雲麟扼要設防以杜  
回竄現在白杲山內東竄之賊由大坳小坳竄蔡  
家河等處鵝籠司安家寨各賊股尙未盡除是楚  
北賊氛仍熾官文當指揮各軍多設偵探視賊所  
向跟蹤躡剿未可復任擾及完善張之萬等奏豫  
軍會剿麻城獲勝麻城之賊如敗竄東北卽係豫



之商城地面疊諭張之萬派兵防堵現經僧格林  
沁派張曜徐連陞所部前往商城駐紮著張之萬  
嚴飭該總兵等實力守禦如能出境迎擊更勝於  
本境設防如由黃孝折而西北卽是豫省之信陽  
羅山著飭派出之張士元馳赴信羅嚴扼要隘其  
荊子關一路毗連陝境仍應加意防範無稍大意

初九日

丁丑

官文奏言該逆盤踞白杲經成大吉